

Radunanza extraordinaria dals 18 avrigl 2018 a las 20:00h il Cafè Giacometti a Lavin

- 1) Il president, Anton Priuli, salüda a 28 preschaints, 8 s'han s-chüsats. S-chüsà s'ha eir l'actuar Armon. La radunanza es perincletta cha Seraina scriva il protocol.
- 2) Niculin Bickel e Georg Cadonau vegnan elets sco scrutinadurs.
- 3) Il protocol da la radunanza extraordinaria dal 2017 vain prelet ed aprovà da la radunanza.
- 4) **Reglmaint trofeas**
Anton manzuna cha sülla pagina d'internet es displaschaivelmaing amo adüna publichà il reglamaint vegl. Müdamaints haja dat aint il artichel 2 e 3. Anton legia avant quists artichels.

Annetta fa la proposta per ils seguaints müdamaints: tour l'artichel 3 avant l'artichel 2, ed augmentar ils dis per far recuors da 5 sün 10 dis.

Decisiun: La radunanza es cun 17 vuschs per il reglamaint sco preschantà da la suprastanza.

9 vuschs sustegnan la cuntraproposta dad Anetta. Cun quai vain aprovà il reglemaint sco preschantà da la suprastanza.

5) **Propostas da la suprastanza schlargiada a man da la delegiada dals 12. Mai 2018 ad Obersaxen**

➤ 9.1. Dis da chatscha 2019:

Decisiun: Cun 16 vuschs es la radunanza per la varianta 1.

➤ 9.2. Parola per la votumaziun a regard l'iniziativa cunter la chatscha da reducziun:

Dumeng Caviezel voul savair scha aint ils ultims 20 ons esa gnü fat alch fos culla chatscha da reducziun.

Guolf disch cha sainza chatscha da reducziun nu rivain nus intuorn il Parc Naziunal da redüer avuonda il number da tschiervis e cha dafatta pels iniziants da l'iniziativa esa cler cha intuorn il Parc Naziunal dovra üna chatscha da reducziun. Statisticas muossan implü, cha la chatscha da reducziun nun es üna concorrenza per la chatscha da settember. Las cifras da la chatscha 2017 s'han darcheu augmentadas in congual cul on avant. Guolf disch chi füss fos da dir da schi a quist'iniziativa.

Men Franziscus as dumonda che cha quista proposta maina. Fin l'ultim po minchün ir a vuschar a lurna che ch'el voul.

Jon Morell declara ch'is voul savair scha las societats stan davo la «NA»-parola dal BKPJV. Implü disch eir Jon sch'is vess fat alch fos schi nu muosses la statistica cha'l number dals tschiervis tschüfs es dvanta adüna plü grond. Jon muossa üna statistica.

Decisiun: Cun 20 vuschs sustegna la radunanza la «NA»-parola.

- 9.3. Dar liber il tschiervi da curuna ils prüms 5 dis da chatscha
Anton manzuna cha differentas societats til han scrit chi sun cunter quista proposta. Mario disch cha in settember vessna da sajettar vachas e na be tors. El fa attent cha schi vegnan schluppetats daplü tors in settember, ston gnir schluppetadas eir dalü vachas düront la chatscha da reducziun. El es da l'avis da sbüttar quista proposta.
Guolf declera cha'l tor da curuna es important per la structura sociala e per la scumpartiziun dals tschiervis. Els tiran nanpro eir tors plü pitschens chi sun dats libers per la chatscha. La regla per la protecziun dal tor da curuna exista daspö 20 ons, cun buns resultats. Dar liber il tor da curuna metta tenor Guolf in malura la structura d'üna populaziun.
Men Franziscus disch cha'ls chatschaders nu san svesa na che chi vöglian. Ils ultims ons laivan adüna ils chatschaders daplü curuna ed uossa chi da üna proposta sun els darcheu cunter. Emil Stecher nu vezz'aint perche chi füss da schaniar il tschiervi da curuna.
Tenor Anetta e il problem chi vegn dat liber il tor da curuna ils prüms 5 dis da chatscha. Il squitsch sül tschiervi füss cun quai bler massa grond. Ils chatschaders pudessan trar, sainza bler verer, sün tuot ils tschiervis chi han cornas, pigliantoura il lantschet lung.
Decisiun: Cun 19 vuschs es la radunanza cunter quista proposta. (8 vuschs schi)

- 9.4 Resguardar giavüschs regionalis pro la chatscha da reducziun
Rico sustegna la proposta. Ils prüms ons d'eira la chatscha da redicziun organisada ed is vaiva daplü success.
Decisiun: Cun 19 vuschs sustegna la radunanza quista proposta.

- 9.5. Persunas chi fan retscherchas das-chan ir a la chatscha da reducziun
Daniel Franziscus ed Anetta chatta quai üna buna roba.
Guolf nu vezzaint perche ch'id es da far üna regla speziala per 3-4 chi vöglian profitar. Inchün chi va a far retscherchas cugnuoscha las reglas e sa sün che ch'el as lascha aint. Il club da chans es cunter quista proposta.
Decisiun: Cun 19 vuschs es la radunanza cunter quista proposta. (5 vuschs schi)

- 9.6. Ün tschiervi da curuna infra 10 ons
Decisiun: Cun 22 vuschs es la radunanza cleramaing cunter quista proposta.

6) Elecziun delegiats

Sco delegiats per la delegiada dals 12 mai ad Obersaxen as mettan a disposiziun Armon, Mario ed Anton. Eir scha nossa secziun ha be duos vuschs, van els in trais per garantir chi vegn vuschà tenor las decisiuns da quista saira.

7) Rendaquint Urezzas (infuormaziun)

Marcus perschainta il rendaquint dal tir urezzas.

Quel sera cun ün guadogn da CHF 4'054.75 ed ha üna facultà da CHF 14'217.30.

Marcus fa attent cha la muniziun da militar (GP11) nu das-cha plü gnir vendüda a chatschaders e nu das-cha plü gnir tratta da chatschaders. Muniziun da militar das-cha

gnir tratta be plü cun armas da militar. Domenic Schaniel organisescha muniziun caliber 7.6 cha'ls chatschaders das-chan cumprar e dovrar.

Anetta fa la proposta da metter la charta uffiziala cun quist'infuormaziun sülla pagina d'internet. Anton surpiglia quista pendenza.

8) Spassegiada aint il Parc Naziunal als 23 e 24 gün 2018, chamonna Clozza.

Marcus disch cha pel mumaint sun entradas 17 annunzchas, lö füssa per total 35 persunas. I füss be schi gnissan amo ün per annunzchas. Reto Strimer preschainta cuort il program.

9) Program da lavur

Mario preschainta il program da lavur. In sonda, ils 26 mai es ün di da lavur cumüna. Previs esa da tour gio saiv sü Clüs. Als 30 gün e 21 lügl sgiar Prasüra, Suotdossa e Valsoncha.

Il rendaquint 2017 es gnü fat bun cun CHF 2'144.- ed il preventiv 2018 es eir gnü fat bun cun CHF 2'144.-.

Project Salvamaint usöls:

La drona es gnüda postada e pajada. Sco pilots s'han mis a disposiziun ils seguaints commembers: Sandro Fedi, Georg Cadonau, Armon Schlegel, Mirco Hänny, Mario Hässig. Armon ha fat ün flyer chi descriva il process. Quist flyer vegn dat gio als paur. Mario preschainta il process e da gio la glista da piket. Chi chi ha piket, ma nu po gnir, sto svessa organisar üna persuna chi surpiglia il servezzan. Ils candidats nu sun sülla glista. Els pon natüralmaing eir tour part. A las 5.00h as stoja esser pront. Quist project funcziuna be scha tuots fan part!

Il process ed il plan da piket vegnan publichats sülla pagina d'internet.

10) Orientaziuns cifras da chatscha

Guolf orientescha a man da graficas infuormativas las cifras da la chatscha 2017. Implü muossa'l ingio ch'i sun gnüts vis uors, lufs e lufs tscharvers.

11) Varia

Dumeng Caviezel voul savair ingio ch'id es pevis da far ün tagl per promover l'urugal. Emil Kuen declera cha la taxaziun d'urugals es statta majgra e cha perquai nu sa'l schi vegn fat ün tagl. Daplü infuormaziuns pudess dar l'uffizi chantunal da god.

Marcus infuormescha cha Clara e Christian Mayer fan inavanl l'ustaria gio Urezzas.

Il president serra sia prüma radunanza a las 22.00h cun ün applaus dals commembers.

Per il protocol: Seraina Caviezel

Ardez, ils 21 avrigl 2018